

四庫全書

經部

欽定四庫全書

經部

禹貢說斷卷一

詳校官給事中_臣李臺

通政使司副使_臣其瞻萊履勘

總校官庶吉士_臣倉聖脉

校對官中書_臣吳甸華

謄錄監生_臣陸維新

欽定四庫全書

經部二

禹貢說斷

書類

提要

臣等謹案禹貢說斷宋處士金華傅寅撰朱彝尊經義考有寅所著禹貢詳解二卷通志堂嘗刊入九經解中而永樂大典載其書則題曰禹貢說斷並無詳解之名又經解所刊本稱原缺四十餘簡今檢永樂大典本不獨

所缺咸在且其五服辨三千餘言九州辨千數百言校原缺目更多至數倍又喬行簡序稱寅著羣書百考事為之圖禹貢說特其一種是編當先以山川總會及九河三江九江四圖而次及諸家之說今經解四圖俱誤編入程大昌禹貢論中與其書絕不相比附而永樂大典獨系之說斷篇內蓋當時所見實宋時原本足以依據而經解刊行之本則已

為後人傳寫錯漏致併書名而竄易之非其
舊矣書中博引衆說斷以己意具有特解不
肯蹈襲前人其論孟子決汝漢推淮泗而注
之江為古溝洫之法尤為諸儒所未及洵卓
然能自抒所見者呂祖儉謂其集先儒之大
成唐仲友謂職方輿地盡在腹中深為名流
所推重信不虛也今取經解刊本謹依永樂
大典本詳加校定謬者正之闕者補之析為

四卷仍題說斷舊名而於補缺之起訖各加
注語以別之庶幾承學之士得以復見完書
焉乾隆四十六年四月恭校上

總纂官

臣紀昀臣陸錫熊臣孫士毅

總校官

臣

陸費墀

欽定四庫全書

禹貢說斷卷一

宋 傅寅 撰

禹貢 夏書

孔氏曰此堯時事而在夏書之首禹之王以是功
唐孔氏曰此篇史述時事非是應對言語當是水土
既治史即錄此篇其初必在虞書之內蓋夏史抽
入夏書或仲尼始退其第事未可知也

林氏曰邶鄘衛之詩邶地所採者則謂之邶國風鄘地所採者則謂之鄘國風衛地所採者則謂之衛國風其間非有異也禹貢之篇夏史所錄故不得謂之虞書而謂之夏書耳孔氏乃謂此堯時之事而在夏書之首禹之王以是功此過論也

沈氏曰禹貢之篇虞書也作於有虞之世述於有夏之時故後世係之夏書以明禹之所作也

張氏曰此一篇以為史官所記邪而其間治水曲折

固非史官所能知也竊意禹敷土隨山刊木奠高山大川此史辭也若夫自冀州至訖於四海皆禹具述治水本末與夫山川之主名草木之生遂田賦之高下土色之黑白山之首尾川之分派其所以弼成五服聲教訖於四海者盡載以奏於上藏史官史官畧加刪潤叙結成書取以備一代之制作謂之夏書然其間祇台德先不距朕行此豈史辭哉此禹之自言也

堯典堯之書也而為虞書之首禹貢舜之時所作也而為夏書之首孔子之定書如此何也舜之有天下蓋傳於堯而禹有地平天成之功是其所以受舜之禪宜也至於湯草夏則其書首湯誓武王翦商則其書首泰誓聖人之意蓋可知矣孔氏之言曰此堯時事而在夏書之首禹之王以是功此正殆於有見而林氏執邶鄘衛之說以非之未可為通論

禹別九州隨山濬川任土作貢

孔氏曰分其圻界刊其木深其流任其土地所有定其貢賦之差

唐孔氏曰禹別九州之界隨其所至之山刊除其木又曰計九州之境當應舊定而云禹別者以堯遭洪水萬事改新此為作貢生文故言禹別耳又曰賦者自上稅下之名謂治田出穀故經定其差等謂之厥賦貢者自下獻上之稱謂以所出之穀市

其土地所生異物獻其所有謂之厥貢雖以所賦之物為貢用賦物不盡有也亦有全不用賦物直隨地所有採取以為貢者此之所貢即與周禮太宰九貢不殊但周禮分之為九耳其賦與周禮九賦全異彼賦謂口率出錢不言作賦而云作貢者取下供上之義也諸序皆言作某篇此序不言作禹貢者以發首言禹句末言貢篇名足以顯矣百篇之序此類有三微子作誥父師少師不言作微

子仲虺作誥不言作仲虺之誥與此篇皆為理足而畧之也

班氏曰昔在黃帝作舟車以濟不通旁行天下方制萬里畫埜分州

陸氏曰周公職錄云黃帝受命風后受圖割地布九州鄒子云中國為赤縣赤縣之內為九州春秋說題辭云州之言殊也

林氏曰顓頊置九州堯時洪水斷絕使禹理水還為

九州

王氏曰王制云廣谷大川異制民生其間者異俗故禹別九州皆奠高山大川以正封域

蘇氏曰不貢所無及所難得

葉氏曰記云共工氏之霸九州也其子曰后土能平九州故祀以為社則九州之名舊矣洪水之害山川土壤封域經界貢賦之制蕩析湮墊皆失其正至禹而復辯故言別水行地上四方不通必隨山

刊木以為道然後能度其形勢觀其源委而川可
濬川濬而九土見矣辨其名物以制地征作民職
而貢賦出焉貢賦雖異而以奉上為主故謂之貢

祭法注云共工氏
在太昊炎帝之間

張氏曰洪水滔天九州莫辨禹欲治水先定九州之
界然後隨九州之山濬九州之川使水復歸故道
而入於海

陳氏曰九州之為州久矣然州之義學者不論也在

堯之時洪水之害浩浩蕩蕩封疆之界不可得而別也禹從其巨鎮之在水中者而別之曰此冀也此兗也此青徐也此荆揚也此豫梁雍也是巨鎮之宛然出於水之中故曰九州也州與洲同隨山濬川者隨水源之所自出者濬之以為川不汨其潤下之性故也

洪水之害如此其久使彌年亘月無有止息則民生無噍類矣以理推之當亦每歲之中泛濫

有時如今之春夏暴長而特為尤甚焉耳禹之
治之也當其懷山襄陵之際亦無所措其力憂
民之切雖曰由已溺之亦必俟其勢之既殺方
嚮有可辯而土功有所施於是乎寢寢規畫以
豫為後來之防而已若其別九州如陳氏謂從
其巨鎮之在水中者別之余恐無是理也學不
通世務腐儒耳故余不得不為之辯

林氏曰賦者九州之田賦是也貢者兗州而下厥貢

筐之類是也別而言之雖有貢有賦有上下之差
合而言之則貢者乃賦稅之總稱不必漆絲鹽絺
之類然後謂之貢蓋併與田賦之所出包筐之所
入皆在其中矣此貢之一字與商之助周之徹皆
是其一代之制取民之總名也

古人之命名不苟也三代取民之制必以貢助
徹為名其用心之仁可知矣是故史官之名此
書孔子之作此序皆於貢之一字深致其意幼

學能於此乎察壯行猶於此乎背況未嘗知此者乎

呂氏曰隨山有兩意一謂隨山開道以觀水勢一謂隨山之脈絡相視其水勢濬其川

程氏曰禹之自言曰予決九川距四海濬畎澮距川者因也孔子叙其書曰隨山濬川任土作貢者亦因也孟子曰禹之行水也行其所無事亦因也因者本其所以自然而無所增損云耳功以因而成則

書載其功亦豈外於因哉

九州之分尚矣顧其高山大川託以為疆界所
視者不容無所記載禹為司空習此亦素而特
其洪水為害封域淪壞川流故瀆亦決徙不明
故禹先定其高山大川之方嚮以別九州之分
限則凡地之遠近高下水之源委曲折皆可得
而審矣隨山濬川任土作貢於是次第施之何
往而不如其意乎任土作貢夫人能言之而隨

山濬川說者罕見其的余請詳辯之禹之自言
曰予乘四載隨山刊木史之辭亦曰禹敷土隨
山刊木說者意孔子序文當不與之異故多以
刊木通道為解殊不知孔子之文隨山濬川與
任土作貢對立隨山而濬川任土而作貢程氏
所謂因其所自然之謂也且四瀆之水皆東行
以入海而弱水則西黑水則南者其所出所逕
之山勢則然也山之勢所向背水因而趨避之

者也禹不能逆山以行水亦猶不能強所無以作貢應變施設雖曰多端而經畫妙用同乎順理孔子序書凡三句十二字而深於經意者知其諒貫首末無復餘蘊此豈泥於文辭之間者所能窺哉

禹敷土隨山刊木奠高山大川

孔氏曰洪水泛溢禹分布治九州之土隨行山林斬木通道奠定也高山五嶽大川四瀆定其差秩祀

禮之規

唐孔氏曰禹身行九州規謀設法乃使佐已之人分
布治之於是平地盡為流源鮮有陸行之路故將
欲治水隨行山林斬木通道往者山為水所包川
皆泛濫祭祀禮廢今始定之以見水土平復舊制
也

司馬氏曰禹與益后稷奉帝命命諸侯百姓興人徒
以傅土

唐司馬氏曰尚書作敷土今按大戴禮作傳土故夏本紀依之傳即付也謂付功屬役之事

顏氏曰敷分也謂分別治之奠定也言禹隨行山之形狀而刊斫其木以為表記決水通道故高山大川各得安定也

蘇氏曰敷道脩載叙義皆治也山行多迷刊木以表之且以通道史記云行山表木

葉氏曰辯九州之封域而分布之使官各有守以任

其事民各有宅以任其力而後隨山刊木之功可
施隨山刊木以通道於四方而後高山大谷之名
可正山川有主名而後或自山導或自川導而水
可得治矣高山大川如荆岐江漢是也治水者不
逆其性而行其所無事則惟形勢之順而已形勢
以山川為主山川以其高且大者為主高山大川
各定其所而名正則其餘可以類求奠定也猶周
官言奠地守也

張氏曰敷分也敷土即別九州之義以謂分辯九州之地然後隨山之形勢以導水之歸路且又刊木之蔽障以表山路之遠近則又定高山如五岳者大川如四瀆者東西既辯南北已明然後導山導川可得而施功也此蓋禹初措手治水之規模也林氏曰鯀湮洪水以與水爭勢於隄防之間適以激其怒耳故禹惟務敷土而散之不與水爭勢而水得性矣此所以有成功也隨山刊木者除障蔽而

驅禽獸使避水者各安其居也莫高山大川者本其風俗之異以為九州經界之準也

程氏曰禹之經畫必以奠高山大川為始蓋高山既奠則避礙有方大川不迷則濬距有向

呂氏曰史官作禹貢先言禹敷土三字見禹有一定之規模在胸中分布九州之土甚處用此治甚處用彼治工役計用多少然後用工所以終能成功定高山有箇標準次便看得箇大川所歸喻如築

城若尋常築動是數年不能得成至李光弼築萬里城不過數月之功蓋先擺布甚處成隊聲勢相接故能速成禹之治水其規模在此而已刊木以通道定高山大川以為高表凡一州之內必有高山大川先定其所知以為表則其他皆可知

治水非土木為用不可也土則隨處以分布木則隨山以刊伐見禹之規模簡易無生事擾民之患也如治華陰之河則先於華陰左右分布

可取之土於華陰之山刊用便近之木此敷土
隨山之義若夫奠高山大川則是定其方嚮源
委以辨地域以知遠近以察衆流之所趨會而
馴以加功故也此與孔子所謂別九州同

冀州

釋地曰兩河間曰冀州郭氏註曰自東河至西河李
氏曰兩河間其氣清厥性相近故曰冀冀近也

林氏曰其地險易帝王所都亂則冀安弱則冀强荒

則冀豐故曰冀州

唐孔氏曰九州之次以治為先後以水性下流當從下而泄故治水皆從下為始冀州帝都於九州近北故首從冀起而東南次兗而東南次青而南次徐而南次揚從揚而西次荆從荆而北次豫從豫而西次梁從梁而北次雍雍地最高故在後也自兗以下皆準地之形勢從下向高從東向西青徐揚三州並為東偏雍州高於豫州豫州高於青徐

雍豫之水從青徐而入海也梁高於荆荆高於揚
梁荆之水從揚而入海也兗州在冀州東南冀兗
之水各自東北入海也冀州之水不經兗州以冀
是帝都河為大患故先從冀起而次治兗若使冀
州之水東入兗州水無去處治之無益雖是帝都
不得先也

蘇氏曰堯水河為患最甚江次之淮次之河行冀兗
為多而青徐為下流被害尤甚堯都於冀故禹行

自冀始次於究次於青次於徐四州治而河患衰
矣雍豫雖近河以下流既治可以少緩也故次於
揚次於荆以治江淮江淮治而水患平故次於豫
次於梁次於雍以治江河上流之餘患而雍最高
故終焉八州皆言自某及某為某州而冀獨否蓋
以餘州所至知之先賦後田不言貢篚皆與餘州
異

林氏曰禹之治水其始也必決其懷襄之水然後及

導其川澤之流而其所為先後之序具載於九州
之後導岍及岐以下是也此之所載但記夫九州
之經界與其田賦貢篚之詳若夫治水之先後不
在於此也夫洪水之為害泛濫於天下其治之不
必相視其水之大勢順其地之高下漸而導之不
可拘於經界之限也故自導岍及岐以至於又東
北入於河其首尾本末各有條理蓋治水之勢未
嘗不自上而導下自下而決之於海也史官條列

備言於經界之後論九州者但當觀其分疆定界
與夫制田賦之多寡不必論其先後之序王制曰
自東河至於西河千里而近自常山至於南河千
里而近此則冀州之境界也

張氏曰冀州不言山川所界如濟河惟兗淮海惟揚
者蓋王者以天下為家京師為室其山川則當以
天下為界安可如餘州之局以山川哉此又禹之
微意也

孔蘇二家執九州之次以為禹之治水自下而
上林氏執導岍以下之文則以為自上而下二
者將孰從而折衷之孟子曰禹疏九河濬濟漯
而注諸海決汝漢排淮泗而注之江然後中國
可得而食也孟子之言自北而南自下而上且
不及雍梁而遽言中國可得而食則禹之規摹
亦可見矣若夫導岍至敷淺原此乃記濬畎澮
距川之方嚮導黑水至東北入於河此乃記九

川之首尾林氏未明經意遽執此文謂治水必
自上而下其於世務不通甚矣且使禹之行河
必欲積石之功既畢然後鑿龍門以治華陰孟
津諸處則於三數月之間其或雨潦驟集冀豫
兗青之民又何所賴於禹乎故夫治水者必使
其下能容而有餘易泄而無礙然後可以安受
上流而不至於衝激以生怒禹之經畫所以首
冀兗而後雍梁者此也苟能明此則非惟達禹

貢九州之次且於孟子之談禹知其有自來矣
孔蘇之論又安可忽哉或曰禹疏九河而後瀹
濟漯信孟氏之言有倫也決汝漢排淮泗亦豈
必自下而上乎曰此其文為注江而設也其實
禹之治水淪濟漯之後遂治淮泗以及於江江
治矣然後治漢治汝如禹貢所載九州之次也
或又曰四水惟漢入江耳汝泗入淮淮徑入海
安得俱言注之江乎曰古溝洫法南北東西互

相通灌如揚之邗溝雖吳王所開廣然古必有迹道可以泄淮水而注之南矣不然則孟軻氏豈容無稽據而肆為之說乎

既載壺口

在今隰州吉鄉

治梁

在今同州韓城

及岐

在今鳳翔府岐山

孔氏曰壺口在冀州梁岐在雍州從東循山治水而

西

唐孔氏曰史記稱高祖入咸陽蕭何先收圖籍則秦焚詩書圖籍皆在孔君去漢初七八十年耳身為

武帝博士必當具見圖籍其山川所在必是驗實

而知壺口在冀州梁岐在雍州當時疆界為然也

班氏曰壺口山在河東北屈縣東

按慈州吉昌縣漢北屈也有壺口山

北屈歷晉無改至後魏始更置定陽隋開皇十八年又改名吉昌唐仍舊本朝熙寧五年慈州廢以

吉昌隸隰州更名吉鄉

梁山在馮翊夏陽縣西北

按同州韓城縣漢為

夏陽有梁山隋開皇十八年置韓城

岐山在扶風美陽縣西北

按岐州岐

山縣有岐山周太王徙於岐即此岐山本後周三龍隋開皇十六年改名岐山以有岐山故也

鄭氏曰於此言治梁及岐者蓋治水從下起以襄水

害易也

王氏曰載事也既事壺口然後治梁及岐也水逆行泛濫而亂故治之也

蘇氏曰梁岐二山在雍州今於冀州言之者豈當時河患上及梁岐乎禹通底柱則壺口平而梁岐自治因河而言非以二山為冀州之地也

葉氏曰詩言奕奕梁山惟禹甸之則梁之施功為多而岐因梁以及之者也

林氏曰言冀州之水而及於雍之梁岐者曾氏曰呂

不韋云龍門未開呂梁未鑿

徐州彭城縣呂梁山也有呂梁鎮

河

出孟門之上

孟門山與龍門山相對在今隰州吉鄉縣

大溢逆流無有

邱陵高阜滅之名曰洪水大禹疏通謂之孟門按

地理志謂壺口在北屈之東南而酈道元謂孟門

在北屈之西南則壺口孟門之東山也龍門在梁

山北則梁山龍門之南山也以是言之其先河出

孟門之上橫流而出則知其東之壺口其南之梁

山其西之岐山皆墊於水矣禹於壺口之西闢孟
門而始事於壺口於梁山之北闢龍門而終事於
梁山而其餘功又及岐山焉蓋壺口梁岐一役也
其施功皆同時不可分言於二州故併言於冀也
呂氏曰岐梁皆是龍門左右之地也水之所以為患
正緣龍門狹隘壅塞其水故禹治之鑿龍門使水
勢通行以此觀孟子謂禹之治水行其所無事此
豈得為無事蓋鑿其所當鑿治其所當治所以為

無事也

二州山川有利害相關而同一時之役者非特此也示例於此而他不言可知矣熙寧十年秋七月乙丑河決於澶淵東流入鉅野北溢於濟南溢於泗而彭城最受其害水之環城至高二丈八尺時蘇東城守彭城恐其民驚潰乃登城以鎮之曰當與城俱存亡及水退東城相視於城之東門正當水之衝府庫在焉而地狹不可

以為甕城乃大築其門護以碑石建黃樓於其上繼而賴濱將之宋過而登之乃為之賦曰嗟維此邦俯仰千載河東傾而南洩蹈漢世之遺

害

漢元光河決軹子

包原隰而為一窺吾墉之摧敗呂

梁齟齬橫絕乎其前四山連屬合圍乎其外水洄洑而不進環孤城而為海觀此賦則知呂梁與河患相表裏也呂不韋之說蘇賴濱之賦學者不可不知

既脩太原

在今太原府榆次縣

至於岳陽

即今晉州霍邑縣霍山

孔氏曰高平曰太原今以為郡名岳太岳在太原西

南山南曰陽

唐孔氏曰太原原之大者漢書以為郡名即晉陽縣

是也

按隋文帝改漢晉陽為太原縣本朝太平興國四年省太原入榆次榆次在府東南七十里

里

班氏曰河東堯縣有霍太山在東

林氏曰晉州霍邑縣有霍山一名太岳山禹貢所謂

岳陽

按後漢順帝陽嘉二年薨更名永安隋開皇十八年永安更名霍邑

王氏曰地為水所攻蕩隳圯而壞故脩之也

葉氏曰載始事也傳言禹能脩鯀之功則鯀之功不皆廢也蓋有因而脩之者焉鯀惟知治太原至岳陽而不道壺口推而上之以及梁岐而與岳陽會此功所以不成故禹始事壺口治梁及岐壺口梁岐治因脩鯀之舊迹以至於太原岳陽

張氏曰此言既治太原之水汭流而至於太岳之南

也太岳在太原西南上流既治則下流通利而入於南河矣

林氏曰曾氏云太原汾水之所出岳陽汾水之所經

既脩太原至於岳陽導汾水故也

按水經汾水出太原汾陽縣北

管涔山南過永安縣西至汾水陰縣北西注於河今憲州靜樂縣即漢汾陽地也管涔山在其界河中寶鼎縣即漢汾陰也本朝祥符四年改為榮河

覃懷底績

即今懷州之地

至於衡漳

清漳出本潞州涉縣濁漳出長子縣

孔氏曰覃懷近河地名漳水橫流入河從覃懷致功

至橫漳

唐孔氏曰地里志河內有懷縣在河之北蓋覃懷二字共為一地衡即古橫字橫漳在懷北五百餘里從覃懷致功而北至橫漳也

杜氏曰懷州禹貢覃懷之地

按唐貞觀元年省懷縣入武陟而杜氏云武陟

漢懷縣地故城在今縣西是貞觀所省懷縣即漢之舊而武陟亦其地也後世變更名號不一難以盡詳唐志云河內縣有懷水往古覃懷之地也今懷之河內武陟皆有之武陟在河內東八十五里

班氏曰清潭水出上黨沽縣太谷東北至渤海阜

城縣入河濁漳水出長子縣鹿谷山東至鄴入清

漳

阜城今隸永靜軍今為相州臨漳縣之鎮蓋熙寧六年省洛州肥鄉深州鹿城冀州衡水恩州

漳南皆漳水所逕唐天寶十五年更鹿城名東鹿本朝至和元年省漳南入歷亭

林氏曰曾氏云河自大伾折而北流漳水東流而注之地之形南北為從東西為橫河北流而漳東流則河從而漳橫矣禹自覃懷致功遂踰太行而北既得漳流而導之入河漳水合河下流如不以道則亦害於河流故也曾氏論禹貢山川地理援引

書傳考究源流其說皆有依據比諸儒之說為最
詳

堯都冀之平陽今晉州所治臨汾縣也禹之治
水莫先於帝都而冀州三方距河深患所在其
疏導莫先於河矣然行河當自下流始而冀州
所紀惟急於帝都之傍近而下流未嘗及焉何
也今以地里詳之壺口梁岐皆帝都之西也太
岳在霍邑霍邑北臨汾百有餘里則太原岳陽

帝都之北也。覃懷帝都之南也。衡漳帝都之東也。於帝都四面固無水不達於河。而吾第憂河之下流不決而上之水皆奔赴之。速則豫究青徐之民將何所逃。其害乎禹之用固愛君之至。而其於救斯民之溺。特可緩乎。竊嘗思之而得其說於孟子之談禹。而又熟復禹貢之書。然後其疑始釋。而於神禹治水之規畫。始井井乎其序矣。孟子之言曰。禹疏九河。淪濟漯。是其於

談禹之要旨無出於此者夫九河者河之最下而濟漯者其傍流也治其最下而速其行通其傍流而使其中無停積之患則河之大體無足憂矣禹既規畫成此然後疏帝都四傍之水舉達於河而冀州之患平矣冀州之患既平則凡究青徐揚之所當治或四載躬臨或贊佐分命又從而次第舉矣苟或不然則雖奇計百出隄防萬端以殫終身之勞而水胡可得而治耶今

觀禹貢而冀州不言疏九河以九河為兗州之地而首言於兗州故也不言淪濟漯以漯流兗州濟歷豫兗而不可總之於冀故也且又導九州之首尾各已條列於後使於每州一一言之則經文不幾於重複之甚乎又況禹之治水苟其利害相因則雖一川異州亦必有同一時之役者如其必待某州之功畢然後治某州則禹之聖豈無權而幾於執一者乎或曰壺口梁岐

之後曾氏以為鑿龍門而冀州所記不及龍門
何也曰導河積石至於龍門已列之於後故於
此但言壺口梁山所以互見其事也亦猶言導
岍及岐至於荆山逾於河而捨梁山不言者與
此治梁互見之也壺口雷首至於太岳則上捨
太原而不言下舉雷首以見治龍門梁山之下
而底柱析城王屋太行之治則覃懷底績之由
也禹貢一書吾姑舉其一州言之其互見之法

精密如此學者可得而易言乎哉或又曰載始
事也禹經始冀州莫先龍門而雷首底柱析城
王屋太行皆居其後乎曰淪濟之時固嘗有利
害相因而導之矣然龍門汾水未治於上則雷
首而東欲底績不能也故論天下之大勢禹之
經畫雖無先於疏九河淪濟漯而就冀一州言
之則龍門者咽喉之害也汾水抑又次焉史書
之曰冀州既載壺口治梁及岐既脩太原至於

岳陽然後覃懷底績以至於衡漳先後之序曉然如此然學者不識形勢而觀此書譬之青天白日瞽者欲知其清明其可得乎

厥土惟白壤厥賦惟上上錯厥田惟中中

孔氏曰無塊曰壤水去土復其性色白而壤賦謂土地所生以供天子上上第一錯雜雜出第二之賦田之高下肥瘠九州之中為第五

顏氏曰柔土曰壤

唐孔氏曰九章算術穿地四為壤五壤為息土則壤是土和緩之名故云無塊曰壤孟子稱稅十一為正輕之於堯舜為大貉小貉重之於堯舜為大桀小桀則此時亦什一稅俱什一而得與九等差者人功有強弱收穫有多少傳以荊州田第八賦第三為人功脩也雍州田第一賦第六為人功少也是據人功多少總計以定差此州以上上為正而雜為次等言出上上時多而上中時少也多者為

正少者為雜此計大率所得非上科定也但治水
據田責其什一隨土豐瘠是上之任土而下所獻
自有差降即以差等為上之定賦也然一升一降
不可常同冀州自出第二與豫州同時則無第一
之賦豫州與冀州第一同時則無第二之賦或容
如此事不可常

鄭氏曰此州入穀不貢

王氏曰物其土田以知所宜奠其賦以知所出也冀

州之土非盡曰壤而曰白壤者其大致然也餘州
蓋皆如此

蘇氏曰賦田所出穀米兵車之類禹貢田賦皆九等
此為第一雜出第二之賦冀州畿內也田中中而
賦上上理不應耳必當時事有相補除者豈以不
貢而多賦耶然不可以臆說也

葉氏曰此周官所謂以土均之法辯五物九等以制
地征者也五物五地之所宜物也以五物制地征

故賦有出於土者此庶土交正而為之者也以九等制地征故賦有出於田者此咸則三壤而為之者也惟賦不皆出於田故有田上而賦寡如徐青梁之類而甚若雍之田上上而賦乃中下者有田下而賦多如豫冀揚之類而甚若荆之田下中而賦乃上上者田下而賦多則土賦兼其間也田上而賦寡則又溝畎灌溉之於水旱畜泄有利否而人力衆寡勤惰之不齊不可概以田為率也賦以

出於田為正故餘州皆以賦次田而冀州獨以賦
次土者蓋冀州之田第五而土白壤賦出於土宜
多於田

林氏曰周官大司徒之辨十有二壤之物而知其種
以教稼穡樹藝終以土均之法辨五物九等制天
下之地征以作民職以令地貢以斂財賦以均齊
天下之政蓋將欲教民樹藝與夫令地貢斂財賦
必辨九州土壤之所宜土性不同則所宜之穀亦

不同如周官職方氏荆揚州宜稻冀雍州則宜黍
稷之類因其土地所宜而教之播種則其所收者
必多也故禹於洪水既平之後將欲教民粒食因
而致田賦之差必先辨九州土壤所宜以利民也
九州之賦較數歲之中以為常則自九州之賦自
有常數而九等之差亦不可易也而又有錯出於
他等之時者蓋歲有豐凶水旱之不同不可取必
於每歲之常賦必時有所蠲放以利民是以其所

入之總數自有增損多寡之不同孟子曰治地莫
善於助莫不善於貢貢者校數歲之中以為常樂
歲粒米狼戾多取之而不為虐則寡取之凶歲糞
其田而不足則必取盈焉為民父母使民盼盼然
將終歲勤動不得以養其父母又稱貸而益之使
老穉轉乎溝壑惡在其為民父母也孟子此言謂
其有激而云將以救戰國之虐政則可若謂禹貢
之法為不善則不可蓋九州之賦既有每歲之常

數而又有雜出於他等之時則是其於凶年無取
盈之理觀禹貢一篇然後知禹之貢法未嘗有不
善也禹之貢法固善矣意者後世之子孫不善用
之惟取必於每歲之常賦而又有雜出於他等之
時此夏法之所以為弊也田之高下既分九等則
其田賦亦當稱是而乃有異同者蓋有高下田逐
畝所收之多寡而比較之然九州之間地有廣狹
民有多寡則其賦稅所入之數自有不同不可以

田之高下而準之也。荊州之田下中而賦則上下
田賦相較所差者亦五等。田賦所以如是之遼絕
者，蓋洪水既平之後，民之蕩析離居，未復其業，必
有偏聚之地。闢地有先後，人功有脩否，不可得而
均也。是以賦之所入與田之等級有如此之懸絕
也。貢篚之制自兗州而下皆有之，而冀州獨不言
者，蓋畿內之地，天子之封內，無所事於貢也。

張氏曰：冀州之水既治而土賦與田皆可辨其名色。

定其高下也蓋天下至大先王所以坐運於一堂
其風俗所尚土地所宜無不周知其折則以有
圖書為可按見也聖賢巧思於此可知在五帝則
有九邱之書唐虞則有禹貢之篇在周則有職方
之志在漢則有輿地之圖皆所以囊括四海幹運
天下也其可忽哉土惟白壤賦惟第一田惟中中
大數已定不可改易使其當理則有萬世之安使
其不當則有萬世無窮之禍是故非禹之聖賢其

物土田定賦貢安知其不為害也唐明皇失德自
宇文融為括田始始以客戶為主戶以見賦為羨
賦自此明皇侈心愈開而王鉞楊謹矜楊國忠輩
皆祖述其意名色百出遂至於亂盧杞又祖述其
意以奉德宗亦有奉天之亂以是知物土色定田
賦豈可忽哉

呂氏曰賦上上田中中差四等冀堯之都事事皆出
於此所以特重於他州然別有所利亦與他州一

一般

此州紀賦於土田之間見土田皆有賦也然賦出於田者多故餘州惟以賦次田

冀

田第五
錯第二

賦第一

兗

田第六
錯無

賦第九

青

田第三
錯無

賦第四

徐

田第二
錯無

賦第五

揚

田第九
錯第六

賦第七

荆

田第八
錯無

賦第三

豫

田第四
錯第一

賦第二

梁

田第七
錯第九

賦第八第七第九

雍

田第一
錯無

賦第六

林氏之說曰九等之差不可易而又有錯出於

他等之時者蓋歲有豐凶之不同不可取必於

每歲之常而時有所蠲放以利民故所入之總

數自有增損多寡之不同此其為說甚善而愚

竊有甚疑者二不可以不論也九州惟冀充豫
梁有錯而餘所無者五州豈水旱之災惟冀充
豫梁為有而餘則無之乎不然何厚於彼而薄
於此也冀之賦第一而錯降之為二梁之賦第
八而錯降之為九是優恤之例然也至於揚則
自七而升六豫則自二而升一梁則又有自八
而升七九之時凡水旱宜優恤而顧反增益何
耶如其謂樂歲粒米狼戾多取之不為虐則禹

亦豈於定制之外橫有所取於民者乎夫孟子之議貢蓋其叔世之弊政而禹之定制雖校數歲之中以為常其於凶荒之歲則必有為之輕恤者矣其於上熟之歲則必能藏富於民矣如其不然則豈有禹聖人而於政在養民之說能言而不能行耶竊嘗屏去諸家訓傳獨取經文端坐熟復意其錯之為言非雜也差也九州之賦有一州之內而可均齊者則無差等之例如

其不可均齊則大概幾何而或升或降亦任土
隨宜可也故冀大概則上上而差等之例則有
降而為上中揚州大概則下上而差等之處則
有升而為中下皆其當時之則例如此要不可
以指定言耳若如此說則庶乎經文前後可以
通貫考古者更為我評

恒衛既從

恒水出今定州曲陽
衛水出今真定之境

大陸既作

跨相趙深
三州之境

孔氏曰二水既治從其故道大陸之地已可耕作

班氏曰恒水出常山上曲陽縣恒山北谷東入滹沱

水出代郡靈邱縣東至文安入大河

按上曲陽後齊去上字隋

開皇六年改為石邑七年改曰恒陽唐元和十五年更名曲陽靈邱屬唐蔚州今為化外文安漢勃海之縣也唐隸冀州今隸霸州按水經滹沱水東北至長城注於易水班氏謂入大河恐非文安去長城亦近衛水出常山靈壽縣東北東入厚池

熙寧八年省靈

壽為鎮入行唐按厚池出代州繁時縣東南阜山

逕深州饒陽縣北至冀州信都縣東入海古信都

界當東大鹿澤在鉅鹿縣北

按釋地十藪云晉有大陸孫炎等皆云今

北至海

鉅鹿縣北廣河澤也通典邢州鉅鹿縣漢南蠻地

漢鉅鹿縣今平鄉縣也

按九域志平鄉今廢入鉅

鹿為鎮鉅鹿隸相州是相州鉅鹿縣有大陸通典
趙州昭慶縣漢河廣縣也隋為大鹿縣有大陸澤
唐志云昭慶本大陸武德四年曰象城天寶元年
更名昭慶九域志云皇朝開寶五年改昭慶為隆
平熙寧六年省隆平為鎮入臨城是趙州臨城縣
有大陸通典深州陸澤縣禹貢大陸亦在此唐志
云先天二年析深州饒陽鹿城置陸澤縣九域志
云皇朝雍熙四年省陸澤入靜安是深州靜安縣
有大
陸

曾氏曰恒衛二水在帝都之北而且遠大陸地最卑
而河所經故其功成在禹貢田賦既平之後

葉氏曰河流有歸二水不治而自從也二水從而大

陸可作矣高平曰陸大陸曰阜大陸以地形得名也

大陸之地廣大跨相趙深三州俱有之不止於河所經也恒衛二水既入滹與庫池而滹庫池之治可知矣滹庫池治則大陸之可耕作必矣雖然禹迹既至衡漳則不隨及恒衛而乃於田賦既定之後徐而治之蓋大河既疏汾漳諸水既導冀州之患亦既平矣而恒衛非其所急故

緩之唐孔氏曰禹之治水必每州巡行度其形勢計其人功設施規摹指授方畧令人分布並作此說甚當然緩急先後之宜禹亦不應無有也學者讀禹貢須察其先後緩急之宜則智識可以明而他日輔吾聖君以經綸天下之大務當與禹治水同學者其勉哉

島夷皮服

孔氏曰海曲謂之島居島之夷還服其皮明水害除

唐孔氏曰島是海中之山九章算術所云海島絕邈不可踐量是也

蘇氏曰東北海夷也水患除故復皮服

林氏曰冀州之島夷青州之萊夷徐州之淮夷梁州之和夷與雍州之崐崙析支渠搜皆是逐州之間所近要荒之服也洪水既平之後任土作貢自綏服之內皆有每歲之常貢至於要荒之服則不責其必貢也亦不責其重貨也間有欲効誠於上者

則使之惟輸其所有之物如蠙珠織皮之類是也
島夷皮服者言水害既除海曲之夷獻其皮服也
蘇氏以揚州島夷之卉服為厥篚至於此州之皮
服則云水患既除得服皮服是以此二句分為兩
說其自違戾如此

夾右碣石入於河

山在今平
州盧龍縣

孔氏曰碣石海畔山禹夾行此山之右而入河逆上

班氏曰大碣石在右北平驪城縣西南

顏氏曰碣音
拱按後漢志

碣石山在遼西臨渝縣南隋志北平盧龍縣有臨渝宮有碣石唐志盧龍隸平州

唐孔氏曰下文導河入於海傳云入於渤海

今滄州界

海之郡當以此海為名計渤海北距碣石五百餘里河入海處遠在碣石之南禹行碣石不得入於河也蓋遠行通水之處北盡冀州之境然行南迴入河而逆上也梁州傳云浮東渡河而還帝都白所治則入河逆上為還都白所治也

司馬氏曰九河同為逆河入於渤海瓚釋其言曰河

口之入海乃在碣石也武帝元光二年河徙東郡東注渤海禹時不注渤海也

蘇氏曰夾挾也自海入河逆流而西右顧碣石如在挾掖也

林氏曰冀州所都蓋在東河之西南河之北西河之東三面距河是其建邦設都之意實有取於轉輸之利朝貢之便也禹貢所載上言賦貢篚之事而於下言其所以達於帝都之道其始末曲折莫不

盡備而皆以達於河為至蓋達於河則達於帝都故也此云夾右碣石入於河者蓋在冀州之北者遠於帝都之地或有舟楫轉輸則必遵海道以入於河然後至於帝都瀕河之地則徑自河以達於帝都矣

張氏曰此又記山川形勢所在也

此記島夷入貢之道耳餘不必專自碣石入河也觀西傾因桓是來可見不獨西傾雍之浮積

石亦然記遠不記近此經文之妙

濟河惟兗州

孔氏曰東南據濟西北距河

唐孔氏曰據謂跨之距至也濟河之間相去路近兗州之境跨濟而過東南越濟水西北至東河也

李氏曰濟河間其氣專質體性信謙故云兗兗信也

林氏曰蓋以兗水為名又兗之為言端也信也端言陽精端端故其氣纖殺也

林氏曰自兗州而下八州皆以高山大川定逐州之
界序所謂別九州而篇首所謂奠高山大川也九
州命名之意蓋出於一時之偶然不可必求其義
也

鄭氏曰

漁仲

禹貢之書所以為萬代地理家成憲者以

其地命州不以州命地也如兗州者當時所命之
名後世安知其南在北故曰濟河惟兗州以濟
水河水之間為兗州也以荆山衡山之間為荊州

故曰荆及衡陽惟荊州濟河者萬代不涸之川也
荆衡者萬代不涸之山也使荆究之名得附此山
川雖後世更改移易為不沒矣

九河既道

其地已淪於海

孔氏曰河水分為九道在此州界平原以北是

今德州有

平原

縣

唐孔氏曰河從大陸東畔北行而東北入海冀州之
東境至河之西畔水分大河東為九道故知在究

州界平原以北是也釋水載九河之名云徒駭太
史馬頰覆釜胡蘇簡潔鈎盤鬲津漢成帝時河堤
都尉許商上書曰古記九河之名有徒駭胡蘇鬲
津今現在成平東光鬲縣界中自鬲津以北至徒
駭其間相去三百餘里是知九河所在徒駭最北
鬲津最南蓋徒駭是河之本道東山出分為八枝
也許商上言河下言三縣則徒駭在成平胡蘇在
東光鬲津在鬲縣其餘不復知也爾雅九河之次

從北而南既知三河之處則其餘六者太史馬頰
覆釜在東光之北成平之南簡潔鉤盤在東光之

南鬲縣之北也其河填塞時存故道

成平晉猶存未詳其後廢

於何時先在今滄州之境東光今隸永靜軍通典德州安德縣有漢鬲縣故城在西北

鄭元

云周時齊桓公塞之同為一河今河間弓高以東

至平原鬲津往往有其遺處春秋緯寶乾圖云黃

河為界在齊呂填關八流以自廣鄭氏蓋據此文

為齊桓公塞之也言關八流拓境則塞其東流八

枝并使歸於徒駭也

五代職方考云周顯德二年廢弓高入東光

杜氏曰徒駭鬲津鉤盤胡蘇四河在今景城郡界滄

州

馬頰覆釜二河並在今平原郡界其餘三河未

德州

詳

按以下至九江孔殷孔氏傳刻本闕佚今從永樂大典增入

程氏曰河患惟漢最甚其講求禹跡亦為最詳又與

三代耳目略接其所得知僅如許商所言三河而

亦不能真確唐杜氏乃九得其六此殆難以輕信

也鄭氏謂八河為威公所塞如其果然則鄰境對

立隨受決灌其肯坐視不爭與

漢王氏曰昔天常連雨東北風海水溢西南出浸數
百里九河之地已為海水所漸

林氏曰河自大陸而北分為九河以入於海九河之
名爾雅所謂徒駭一太史二馬頰三覆釜四胡蘇
五簡六滌七鉤盤八鬲津九是也曾氏曰徒駭至
鬲津皆是複名先儒以簡滌為單名固不倫矣爾
雅但載八名其一不名者河之經流也漢許商曰

徒駭是河之本道東出分為八枝審如許商之言
則河自徒駭乃分為八審如曾氏之言則是九河
其一為經流而其八者皆支流也然據下文云又
北播為九河同為逆河入於海九者並列支派則
其勢均也安得以一為經流八為支派哉九河之
地在漢平原郡以北

雷夏

在今濮州
雷澤縣

既澤澠沮會同

孔氏曰雷夏澤名澠沮二水會同此澤

班氏曰雷夏在濟陰城陽縣西北

按通典濮州雷澤縣漢成陽縣也有

雷夏澤隋志云雷澤舊曰城陽後

齊廢開皇十六年復置曰雷澤

唐孔氏曰洪水之時高原亦水澤不為澤雷夏既澤

高地水盡此復為澤也於澤之下言灘沮會同謂

二水會合而同入此澤也

爾雅云河有灘又曰灘反入郭璞注云即河水

決出復還入者今濮州有沮溝九域志以為禹貢沮水觀經會同之文安國謂會同此澤則灘沮二

水皆當自濮州入雷夏而爾雅乃以灘為出於河而復入於河則二水蓋不同矣二水所出所逕載

籍別無所詳雖穎達東坡亦闕而不言

王氏曰既澤者水有所鍾而不溢也

葉氏曰九河未道則水之汎溢者雷澤不能受故九河既道而後雷夏可澤雷夏既澤則灘沮亦會同於海矣

林氏曰灘沮二水先儒並不著其水本末故孔氏曰二水會合同入此澤蓋謂同注於雷澤也

張氏曰九河雷夏灘沮皆在兗州禹先治河使九河復歸故道雷夏復為故澤而灘沮二水復會同於

雷夏則兗州之水患除矣

桑土既蠶是降邱宅土

孔氏曰地高曰邱大水去民下邱居平土就桑蠶

鄭氏曰此州寡於山而夾川兩大流之間遭洪水其民尤困水害既除於是下邱居土以其免於厄尤喜故記之

葉氏曰他州之水或限於山或決於川民皆失其居業惟下流為甚故降邱宅土獨於兗言之

水患去而人有條桑育蠶者矣是其降邱宅土
為可知也是之一言其禹觀省斯民慰喜之辭

與

厥土黑墳

馬氏曰墳有膏肥也

韋氏曰墳音勃憤切起也

厥草惟繇厥木惟條

孔氏曰繇茂條長也

唐孔氏曰繇是茂之貌條是長之體言草茂而木長也

馬氏曰繇抽也

呂氏曰繇始抽條始長水患最深如此與漸邑喬大不同

林氏曰九州惟此與揚徐之二州言草木者蓋此三州比九州之勢最居下流其地卑濕沮洳遭洪水之患草木不得遂其性而生育其已久矣至是而

或繇或條或夭或喬或漸包故於逐州言之以見
水土既平草木得遂其性也

厥田惟中下厥賦貞

孔氏曰田第六貞正也州第九賦正與九相當

唐孔氏曰周易彖象皆以貞為正也諸州賦無下下
貞即下下為第九也此州治水最在後畢州為第
九成功其賦亦為第九列賦於九州之差與第九
州相當故變文為貞見此意也

蘇氏曰貞正也賦當隨田高下此其正也其有不相當者蓋必有故非其正也此州田中下賦亦中下皆第六故曰貞此二者不同當從先儒之說九州之賦相較而為上下之等雍州之賦出第六而兗州之賦不應又出於第六也先儒所以謂州第九賦正與九相當者蓋參考九州獨無下下之賦故此州治水最在後畢州為第九成功其賦亦為第九此其說是蓋洪水之害河為最甚而兗州又河

之下流其被墊溺之患比於餘州最為慘酷故雖能獲播種之功而土曠人希又卑濕沮洳之患未盡去是以樹藝之利尚非所宜雖田在第六而其賦比於九州為最少也

林氏曰厥田惟中下者田第六也厥賦貞先儒云貞正也州第九賦正與九相當

冀賦第一 豫第二

荆第三 青第四

徐第五

雍第六

揚第七

梁第八

兗第九

禹定九等之田九等之賦考於經明甚而不應
於兗一州又附雍之第六而獨無下一等也
東坡之說似是而非二孔之見雖的而貞之一
字訓釋不通林氏取舍雖甚當而論貞之為義
猶孔氏也余不滿於是畫禹賦之次第而思之

然後知經文之妙非後世史官所可跂而望者
何者紀賦之次自冀之上上而至於梁之下中
其為八等著矣究不言其為九可知矣故變下
下之文而言貞所以明其賦為什一之正輕重
不容加損也以一州之斷義而上該八州之成
則經文不亦煥然矣乎猶之行水載治修之三
字舉於冀而八州惟言其效猶之二州之同後
壺口梁岐著於冀而八州惟言境內之所治經

文簡嚴大抵如此非深求其意莫能知也

作十有三載乃同

孔氏曰治水十三年乃有賦法與他州同

唐孔氏曰作者役功作務謂治水也治水十三年乃有賦法始得貢賦與他州同也他州十二年此州十三年比於他州最在後也堯典言鯀治水九載績用不成然後堯命得舜舜乃舉禹治水三載功成堯即禪舜此言十三載者并鯀九載數之祭法

云禹能修鯀之功明鯀已加功而禹因之也此言
十三載者紀其治水三年言其水害除耳非言十
三年內皆是禹之治水施功也馬融曰禹治水三
年八州平故堯以為功而禪舜是十二年而八州
平十三年而兗州平兗州平在舜受終之年也

張氏曰禹治水乃是歷試時歷試三年堯乃禪位以
禹治水成功也舜受禪乃巡狩分九州為十二州
使水未平豈能為此乎是禹貢之作乃堯在位舜

歷試時也

曾氏曰高堂隆之言曰禹治洪水前後歷年二十二載

林氏曰曾氏舉高堂隆之言並以鯀之九載并此十三載而數之為二十二載也此說皆不然據此文承於厥賦貞之下而又曰作十有三載乃同則是專為兗州之賦而言也蓋兗州之賦必待十有三載然後同於餘州非所謂此州治水指十有三載

而後功成也

孟子曰禹八年於外三過其門而不入而此言
作十有三載何也蓋八年而水患平十有三年
而究之田賦定究雖河患最甚施功八年其患
亦已去矣而土田沮洳疆畝廢壞離散未集室
廬未修故猶有待於五年之久而田賦始定者
蓋可知矣經云厥賦貞作十有三載乃同作也
者田里之役作也非指水患言也或曰子之說

於禹貢為通於高堂隆之見為合其如矛盾舜
典何如孔張二公有據何曰予請明辨之自鯀
績不成而舜歷試之初即舉禹以當治水之任
連舜攝位而施功已二年矣舜巡狩何害乎正
使水患未平舜亦豈憚一行為之觀省乎肇十
有二州以洪水之際民多捨卑即高冀青之北
不勝其萃聚矣於是建官不多難以為治故禹
創增三州曰營幽并者亦當時隨宜事耳其寔

禹別九州在歷試時規畫已成凡山川之奠
固已一遵堯舊及敷奏此篇時亦不必改但
所異者九與十二之名耳豈若後世之人冀
以要君之寵而必欲趨時以為便乎又況幽營
之地禹跡鮮及惟常山碣石之役至其南耳并
州之境亦太原一役而已顧必欲變已別之九
為後來之十二何為乎大抵後世傳經之士多
以私意窺億聖人故經意愈不明而說者愈紛

紛也孟子生秦漢之前去古猶近凡有所言正當取信要不可泥孔張三載之說而廢孟子八年之計善稽古者其必有以辨之

蘇氏曰兗州河患最甚故功後成至於作十有三載又前予乘四載傳云水行乘舟陸行乘車泥行乘楫山行乘橐秦漢以來師傳如此且孔氏之舊也故安國知之非諸儒之臆說四載之解雜出於尸子慎子而最可信者太史公也亦如六宗之說自

秦漢以來尚矣豈可以私意曲學鑄鑿傳會為之
哉而或以鯀治水九載兗州作十有三載乃同禹
之代鯀蓋四載而成功也世或喜其說然詳味本
文予乘四載隨山刊木則是駕此四物以行於山
林川澤之間非以四因九通為十三載之辭也按
書之文鯀九載績用弗成在堯未得舜之前而殛
鯀在舜登庸歷試之後殛鯀而後禹興焉則禹治
水之年不得與鯀之九載相接兗州之功安得通

四與九為十三乎禹之言曰娶於塗山辛壬癸甲
是娶在治水之中又曰啟呱呱而泣予弗子惟荒
度土功是啟生在水患未平之前也禹服鯀三年
之喪而至娶自娶而至於有子自有子而至於生
泣亦已久矣安得在四載之中乎反覆考之皆與
書文華異書所云作十有三載乃同者指兗州之
事非謂天下共作十三載也近世學者喜異而巧
於鑿故詳辯之以解世之惑

堯在位七十載鯀考績無成之年也時即求舜而女之舜升於朝蓋七十一載矣治水之事不容緩舜舉禹當七十一載而東坡執洪範鯀則殛死禹乃嗣興之文蓋言父以無功而死子以有德而興非謂鯀死而後禹始用於堯也東坡考四載之說甚當而考經有未的則猶未能杜好奇者之口余故不得不辯

程氏曰禹之自言予乘四載又曰娶於塗山辛壬癸

甲以辛壬癸甲通鯀九載而得年正十有三也是
禹獨任水事之日淺而鯀叛立規模之日長也故
記禮者本其所自而言之禹能修鯀之功也孟子
曰禹八年於外三過其門而不入當是并其佐鯀
之年而計之與

禹代鯀當堯之七十一載適為辛年則程氏之
辭信矣而堯以甲辰即位七十一載乃是甲寅
若以禹代鯀在位七十一載之前堯之六十八

載固是辛亥而孟子言堯憂洪水舉舜敷治舜
乃舉禹舜登庸在七十一載則辛亥禹固未用
借使辛亥禹已見用則七十一載正當甲寅辛
壬癸甲禹之功至此成矣及舜登庸又何敷治
之有而堯之憂猶在於此何耶古之人三十而
娶禹娶在治水之中則堯之用禹亦早矣當鯀
治水時禹年猶幼佐鯀之說亦不可用也使其
果佐鯀如益稷之佐已當必自有職業而亦必

有幾諫正救之功簡牘畧無傳何也今即禹貢
觀之地平天成功績若此其大雖以神為之非
三考責成不可也三考九年孟子止言八年於
外者其一係成功之年禹已還歸故也

厥貢漆絲厥篚織文

孔氏曰地宜漆林又宜桑蠶織文錦綺之屬盛之篚
篚而貢焉

鄭氏曰貢者百功之府受而藏之其實於篚者入於

女功故以貢篚別之

蘇氏曰幣帛盛於篚故書曰篚厥元黃

林氏曰兗州之地宜漆林又宜桑蠶故貢此二物也
有貢又有篚乃八貢之物盛於篚而貢焉古者幣
帛之屬皆盛於篚蘇氏引篚厥元黃為證是也織
文者錦繡之屬曾氏曰織文因織而有文者錦繡
之屬不一故言織文以包之謂之織則繪畫組繡
而有文者不與焉

浮于濟漯

漯水出今北京華縣

達于河

孔氏曰順流曰浮濟漯兩水名因水入水曰達

唐孔氏曰揚州之淞于江海達于淮泗傳云淞江入海自海入淮自淮入泗是言水路相通得乘舟逕達也按青州云浮于汶達于濟經言濟會于汶浮汶得達濟也此言浮于濟漯達于河從漯入濟自濟入河徐州云浮于淮泗達于河蓋以徐州北接青州既浮淮泗當浮汶入濟以達于河也

班氏曰漂水出東郡東武陽至樂安千乘縣入海

應劭

平原郡漂陰縣注云漂水出東武陽東北入海桑欽云漂水出平原郡高唐縣按東武陽其地屬今北京莘縣即今博州之縣漂陰當在今德棣之境而千乘則唐屬青州以地望審之漂水蓋出東武陽而過高唐又東過漂陰至千乘而入海桑氏謂出高唐誤矣

林氏曰二水不必相通苟濟亦可以入河漂亦可以入河則亦可以謂之浮于濟漂達于河達者唐孔氏曰從水入水曰達達當從水入水不須舍舟而陸行也

禹時濟漯皆受河貢賦之道或自濟或自漯各隨其便入河云耳非如穎達謂從漯入濟自濟入河

海岱惟青州

孔氏曰東北據海西南距岱

唐孔氏曰海非可越而言據者東萊東境之縣浮海

入海曲之間青州之境非止海畔而已故言據也

嶠夷

當在今登密之境

既畧濰淄其道

孔氏曰嶠夷地名用功少曰畧濰淄二水復其故道
唐孔氏曰嶠夷地名即堯典宅嶠夷是也嶠夷萊夷
和夷為地名淮夷為水名島夷為狄名皆觀文為
說也畧是簡易之義故用功少為畧也

班氏曰濰水出琅瑯箕北至都昌入海

顏氏云出箕屋山通典云

密州屬漢琅瑯莒縣東北有濰山濰水所出濰山當即是箕屋山異世殊稱耳通典云青州臨朐縣有漢都昌城在東北今故城在濰州界見九域故迹淄水出泰山萊蕪縣原

山東至博昌入沛

通典云淄州淄川縣有淄水溪萊蕪故城在東南博昌唐隸青

州

林氏曰嵎夷則義仲所治東方之極也島夷和夷皆
在要服之外去中國之境宜遠故言其服與底績
而已嵎夷既義仲所治則其地宜近而相及必有
以限其內外而正之故特言既畧春秋傳所謂天
子經畧諸侯正封是也

嵎夷在其東濰淄在其西治水從東而西也嵎
夷封畧昔已有之特為洪水所壞今再修整而

已非禹創為之也

厥土白墳海濱廣斥

孔氏曰濱涯也言復其斥鹵

唐孔氏曰濱涯常訓也說文云鹵鹹地也東方謂之斥西方謂之鹵海畔迫濶地皆斥鹵故云廣斥言
水害除復舊性也

厥田惟上下厥賦中上厥貢鹽絺海物惟錯

張氏曰海物奇形異狀可食者衆非一色而已故雜

然並貢

岱畎絲枲鈎松怪石

鹽絺海物青州大率之貢也至於此五物或惟
岱畎有之或他地有之而不足以貢故別言岱
畎所謂任土作貢於此可見

萊夷作牧

今萊州之地

厥篚檿絲

孔氏曰萊夷地名可以放牧

按通典萊州春秋萊子國也禹貢萊夷作牧是

也

蘇氏曰牧芻牧也傳曰牧隰臯井衍沃並海水患除
始芻牧也屨絲惟出東萊以織繒堅韌異常萊人
謂之山璽萊夷作牧而後有此故書筐在作牧之
後

葉氏曰周官井牧之法以田萊為辨則地以萊名宜
可耕作而畜牧也屨絲繼萊夷言其貢或出於萊
夷也

浮于汶

出今兗州萊蕪縣原山至鄆州須城縣入濟

達于濟

班氏曰汶水出泰山萊蕪縣原南西南入濟


按通典兗州萊

蕪漢舊縣地汶水所出而流入濟桑氏曰汶水西南過壽張縣北又西南至安民亭入于濟鄆氏曰汶水出須昌入濟須昌今為須城鄆州所治壽張今隸鄆州在州西南六十里安民亭當在二縣之界

程氏曰不書達河因兗貢前文也

林氏曰地里志云汶水出泰山萊山縣原山西南入濟即下文所謂導沘水東流為濟東至于河又東北會于汶是也謂此州將欲達于帝都當浮于汶

以達于濟然後由于濟以達于河也



禹貢說斷卷一